

每週經課朗誦經文(巴克禮漢羅/教羅)2014/09/07

共同經課 - 1 出埃及記十二章一節~十四節

1 耶和華佇埃及地對摩西、亞倫講：2 「此月著做恁的正月，做年年的頭一月。3 恁著對以色列的全會講：本月初十日，逐人著照老父的家取羊仔，一家一隻。4 若是一家的人甚少，一隻羊仔食袂了，伊著及隔壁的厝邊照人額相及取一隻。恁備辦羊仔，著按算逐人所會食的量。5 恁的羊仔著無瑕疵的、未滿年的羊犖仔，恁著對綿羊中，抑是山羊中取伊，攏通。6 恁著留到本月十四日，黃昏的時，以色列全會的眾人著剖羊仔。7 in著取淡薄血，抹佇食羊仔彼間厝雙旁的門豎及門楣。8 彼暝著食羊仔的肉；用火焗伊，及無酵餅苦菜參啲食。9 嘔通生生食，決斷嘔通用水煮，著用火焗，頭、腳、及五臟，攏著食。10 攏嘔通留過早起；若留到過早起，著用火燒。11 恁著按呢食伊，腰纏帶，腳穿鞋，手抬柺仔，也著趕緊食；這是耶和華的憲過節。12 因為彼暝我欲遍行埃及地，拍死埃及地一切頭上生的，無論人及精牲，閣欲審判埃及一切的上帝。我就是耶和華。13 此個血佇恁所倚起的厝欲做恁的記號；我一下看見此個血，就對恁憲過去。我拍埃及地的時，災禍無到佇恁來滅恁。」14 「恁著用此日做紀念，守伊做耶和華的節，恁著代代守此個節做永遠的例。

共同經課 - 2 詩篇一百四十九篇 or 一百四十八篇

1 恁著謳咗耶和華！著唱新的歌謳咗耶和華，佇聖的百姓的會中謳咗伊！2 願以色列因為造伊的主來歡喜！願錫安的百姓因為in的王來快樂！3 願in跳舞謳咗伊的名，拍鼓彈琴唱歌謳咗伊！4 因為耶和華歡喜伊的百姓；伊欲用救恩做謙卑的人的妝飾。5 願聖的百姓因為所得著的榮光來歡喜！願in佇眠床裡出歡喜的聲！6 願in的嘴謳咗上帝做高，手抬雙面利的劍，7 通報應外邦，刑罰列國。8 用鍊縛in的君王，用鐵銼來鎖in的人臣；9 欲佇in的身上行所記載的判斷。伊聖的百姓攏有此號榮光。恁著謳咗耶和華。

or

1 恁著謳咗耶和華！對天頂謳咗耶和華，佇高的所在謳咗伊！2 伊的眾使者啊，恁著謳咗伊！伊的眾天軍啊，恁著謳咗伊！3 日及月啊，恁著謳咗伊！發光的星辰啊，恁攏著謳咗伊！4 天頂的天及天以上的水啊，恁攏著謳咗伊！5 諸個攏著謳咗耶和華的名！因為伊一下命令就攏受創造。6 伊將諸個建立，到永永遠遠；伊有定例，袂會廢無。7 對地上著謳咗耶和華，就是大魚及一切的深淵，8 火及冰雹，雪及雲霧，趁伊的話的狂風，9 大山及一切的小山，結果子的樹及一切的柏香樹，10 野獸及一切的精牲，蟲竄及飛鳥，11 世上的君王及萬民，貴族及世上一切的審判官，12 少年人及在室女，老人及囡仔，13 諸個攏著謳咗耶和華的名！因為只有伊的名受尊做高；伊的榮光搬(pôaⁿ)過天地。14 伊興起伊的百姓的角，互伊聖的百姓攏謳咗伊，就是以色列人，親近主彼個百姓，恁著謳咗耶和華！

共同經課 - 3 羅馬書十三章八節~十四節

8 莫得欠人甚麼，只有相疼猶是欠人；因為疼人的，有盡律法。9 因為所講，嘔通行淫，嘔通剖人，嘔通偷提，嘔通貪心，抑是別條誠，攏包含佇此句，著疼厝邊，親像家己。10 仁愛無害著厝邊；所以仁愛是盡律法。11 按呢生知此個時候就是恁已經著睏醒的時；因為咱得著救，比起頭信的時卡近。12 暝欲過，日時近啦；所以咱著褪去黑暗的所行，來穿光明的戰甲。13 所行著端正，親像佇日時。莫得放縱酒醉，莫得好色邪淫，莫得相爭怨妒；14 著穿主耶穌基督，莫得為著肉體圖謀，致到趁私慾。

共同經課 - 4 馬太福音十八章十五節~二十節

15 「設使你的兄弟得罪你，就著去，干單你及伊佇啲的時，指明伊的嘔著。伊若聽你，就得著你的兄弟；16 伊若唔聽，就著導一二人相及去，用二三人之嘴做干證，逐句話通做憑準。17 若唔肯聽in，就給教會講；若閣唔肯聽教會，就著看伊親像外邦人及抽餉的一樣。18 「我實在給恁講，凡若恁佇地裡縛的，佇天裡也欲縛in；凡若恁佇地裡解的，佇天裡也欲解in。19 我閣給恁講，設使恁中間二人佇地裡無論求甚麼，若是同心，就我佇天裡的父欲給in做成。20 因為不論甚麼所在，有二三人佇我的名聚集，我也佇in中間。」